

明

會

要

明會要卷七十五

永新龍文彬纂

方域五

道路

洪武五年

明史系之三十一年

帝諭左都督徐增壽曰曩因碣門距

長河西口道路險隘以致往來跋涉艱難市馬數少今聞

有路自碣門出柘木場

按方輿紀要碣門砦西有柘木場亦要口明史土司傳作枯木任傷

恐徑抵長河西口通雜道長官司道路平坦往來徑直可

卽檄所司開拓以便往來

方輿紀要

十五年五月上諭東川烏撒烏蒙芒部諸部長曰今置郵

傳通雲南宜率土人隨其疆界遠邇開築道路各廣十丈
準古法以六十里爲一驛土司傳

八月乙巳遣使諭傅友德沐英曰關索嶺非古道古道在
西北大軍若開此道以接普定卽芒部諸長可盡獲也同上
二十二年永甯宣慰司言所轄地水道有一百九十灘其
八十餘灘道梗不利詔曹震往疏鑿治之震至瀘州按視
有支河通永甯乃鑿石削崖令深廣以通漕運又闢陸路
作驛舍郵亭駕橋立棧自茂州一道至松潘一道至貴州
以達保甯藍田傳

二十九年五月修我眉至越嶲道途畢工大政記

永樂七年令海子橋至西湖一路水道差官十員往來巡察會典

宣德三年十一月修南海子周垣橋道

大政記

七年五月復開平涼府開城縣迭烈孫道路先是陝西參政楊善言西安諸府州歲運糧餉赴甘州涼州山丹永昌諸衛皆經平涼府隆德縣六盤山巒嵒嶺山澗陡絕人力艱難開城縣舊有路經迭烈孫黃河平坦徑直抵甘州諸衛近五百餘里洪武中官置渡船平涼撥軍造濟人以爲便旣乃罷之今請如舊開通以利民從之

昭代典則

正統四年令各府州縣提調官常巡視橋梁道路隨時修

理會典

成化初用兵河套戶部侍郎陳俊赴河南山陝籌餉俊以榆林道險遠轉輸難乃修西安韓城同官徑道以利飛輓

陳俊傳

二年令京城街道溝渠錦衣衛官並五城兵馬司時常巡視

六年令皇城周圍東西長安街並京城內外大小街道溝

渠不許官民人等作踐掘坑及侵占淤塞

已上會典

十二年余子俊巡撫陝西通南山道直抵漢中以便行旅

余子俊傳

十五年奏定虞衡司添設員外郎一員巡視在京街道溝

渠會典

朝鮮貢道故由鴉鵲關成化十六年貢使請改由鴨綠江
兵部尙書將許之職方郎中劉大夏曰鴨綠道徑祖宗朝
豈不知顧紆迴數大鎮此殆有微意不可許乃止

劉大夏傳

嘉靖中徐九思爲句容縣知縣縣東西通衢七十里塵土
積三尺雨雪泥沒九思節公費整以石行旅便之

徐九思傳

萬厯時丁賓擢南京工部尙書自上元至丹陽道路盡易

以石行旅頌之

丁賓傳

橋梁

日知錄卷二十三
洪武二年三月辛卯徐達造咸陽橋

六年五月造渡淮浮橋

二十五年十一月戊子改建大內金水橋成

永樂十年七月蘆溝河水漲壞橋及堤下工部修築

正統三年二月修蘭縣黃河橋便甘肅餽運已上大政記

王源知潮州府城東有廣濟橋歲久圯壞源斂民萬金重

築之王源傳

九年重修蘆溝橋橋在宛平縣西南三十里金大定二十九年以蘆溝河流湍急令建石橋明昌

三年名曰廣利至是重修

十二年建永通橋已上明一統志

十三年九月工部侍郎王永壽建沙河等處石橋謁陵經行處

天順七年四月己巳建宏仁橋在南海子東牆外

成化十二年十二月造遼東浮橋從侍郎馬文升請也上已

大政記

蓬州知州田鐸建大小二十四橋又鑿三溪山以便行者

田鐸傳

宏治三年蘆溝橋成中官李興乞進文思院副使潘俊等

官因王恕言乃止己修京城河橋帝復從興請授四人官

許五人冠帶王恕傳

四年中官奏修沙河橋請發京軍二萬五千及長陵五衛

軍助役工部尙書賈俊執奏得寢

賈俊傳

嘉靖元年四月重修金水玉河二橋

大政記

二十四年十一月建良鄉琉璃河橋

會典

萬厯二年建涿州胡良河石橋修北關外浮橋

大政記

二十七年都水主事胡瓚督修琉璃河橋三年橋成省費

七萬有奇

胡瓚傳

關津

洪武十五年九月丁卯設北平沿邊要害關隘二百處以

各衛校卒戍守

昭代典則

二十六年定凡天下衝要處設立巡檢司盤詰往來及販

賣私鹽犯人逃軍逃囚 凡運糧馬快商賈等船經由津

渡巡檢司照驗文引若豪勢之人不服盤詰聽所司拏送

巡河御史卽申處究治

已上會典

李驥授戶科給事中時關市譏商旅發及囊篋驥奏止之

李驥傳

宣德三年八月治各關稽留索賄之罪

大政記

四年六月初設鈔關於是有潮縣濟甯徐州淮安揚州上

新河濟墅九江金沙州臨清北新諸鈔關

三編

六年十一月罷各處關津把截軍以其邀阻索詐從御史

陳搏之奏也

大政記

憲宗詔勛戚家不得占據關津陂澤設肆開廛侵奪民利
違者許所在官司執治以聞外戚傳

街市

廟街

太廟右門

社街

社稷壇左門

十王街

東安門外已上見輿服志

成賢街

儒林孔希學傳

東長安街

會典

西長安街

會典

棋盤街

大明門前

長連街

御坊後牆謂之廊下家

短連街

已上見日下舊聞

內市

禁城之左

東市

洪武初設寶鈔行用庫於東市

西市

李時勉傳

洪武元年命在京兵馬司并管市司每三日一校勘街市

度量權衡稽牙僧姓名時其物價

職官志

在外城門兵馬亦

令兼領市司

食貨志

道同爲番禺知縣有土豪數十輩抑買市中物同械其魁

於通衢

道同傳

景泰元年京城勲戚所置市廛月徵稅給事中葉盛以國用不足請籍其稅佐軍餉從之

葉盛傳

四年以鈔法不通令兩京市肆園場稅悉納鈔商民以爲病或閉戶不敢市易拔園蔬伐果木以避

宏治五年刑部尙書彭韶言光祿寺經費不支牲物概賒之市肆大爲賈人累

已上食貨志

九年吏部尙書屠濬等言勲戚縱家人列肆通衢邀截商賈都城內外所在有之伏望綸音戒諭所有店肆悉皆停止更敕都察院揭榜禁戒擾商賈奪民利者聽巡城巡按御史及所在有司執治

憲章錄

武宗令內侍仿設塵肆身衣估人衣與貿易更令作市正調和之楊守隨疏所謂列市肆而親商賈之爲者以此

三編

正德十一年冬帝將置肆於京城西偏給事中齊之鸞上言近聞有花酒鋪之設或云車駕將臨幸或云朝廷收其息陛下貴爲天子富有四海乃至競錐刀之利如倡優館

舍乎

齊之鸞傳

尙書王瓊奏宏治元年百戶王敏建言請於京城內外小巷路口置立柵欄夜間關閉本部會議未及舉行今京城之內大街小巷巡捕官軍巡歷不周盜賊得以藏匿應各置立門柵遇夜關閉本部仍委官如法修置

明臣奏議

萬厯二十五年刑部侍郎呂坤疏言官店租銀收解自趙承勛造四千之說而皇店開夫市井之地貧民求升合絲毫以活身家者也陛下享萬方之富何賴於彼且馮保八店爲屋幾何而歲有四千金之課課旣四千徵收何止數倍不奪市民將安取之今豪家遣僕設肆居民尙受其殃況特遣中貴賜之敕書民困豈顧問哉

呂坤傳

四十二年四月福王常洵設店洛陽與民市葉向高言以藩國之尊下侵商賈之事於體甚褻不報

三編

四十三年五月御史劉廷元請禁內市以消隱禍因諭內地每月三市

初四十四日

相泊年久以濟需用事不可缺但

不許持挾銅鐵鋒利弓矢等物入市違者必懲

同上

寺觀

洪武十二年二月建神樂觀於郊祀壇西永樂十八年建於北京

十六年九月鳳陽大龍興寺成

卽皇覺寺

二十五年二月甲戌重建天界寺

永樂十六年十二月丁未朔武當山宮觀成賜名曰太嶽

太和山

二十二年三月甲辰重建天禧寺成賜名大報恩寺

已上
大政

記

正統十三年太監王振修大興隆寺日役萬人糜帑數十

萬閔麗冠京都英宗爲賜號第一叢林

單宇傳

景泰時中官興安請帝建大隆福寺嚴壯與興隆並四年

三月寺成

同上

成化八年修隆善寺陞工匠三十人爲文思院副使

昭代典則

十四年六月英國公張懋以京營兵苦工作請止圓通寺

修造不聽

大政記

十九年命襄城侯李瑾督軍萬人修大慈恩寺

按明一統志大慈恩

寺在順天府西海子舊名海印寺

二十年僧繼曉請建大永興寺於西市逼徙居民數百家

廢國帑數十萬

繼曉傳

正德七年十一月詔建鎮國寺於大內西城

大政記

嘉靖十年正月毀大慈恩寺

同上

城郭

太祖初拓建康城東北盡鍾山之陽延互周圍凡五十餘

里

大政記

通州城相傳秦蒙恬舊址五代時修築元初壞洪武元年

又修甃以磚石

歷代沿革表

洪武四年八月李文忠築成都新城

李文忠傳

十月丙寅修京師城垣

大政記

六年六月京師城成周九十六里門十有三後復建外郭

周一百八十里門十有六三編

十二年葉昇鎮遼東修海益復三城葉昇傳十二月永嘉侯

朱亮祖發卒三萬人拓廣東城百餘丈昭代典則

十四年鄭遇春從傅友德平雲南帥楊文等經略城池屯

堡鄭遇春傳

二十年湯和築瀕海五十九城備倭湯和傳馮勝等師出松

亭關分築大甯寬河會州富峪四城馮勝傳江夏侯周德興

至閩相視要害築城十有六周德興傳

二十二年命藍玉督修四川城池藍玉傳

二十三年四月詔築京師外垣

大政記

二十四年正月命都督劉真勑立甘肅城池

明政統宗

永樂八年七月築開平衛城

十七年十一月拓北京南城

宣德元年正月脩築廣西南丹城

三年八月壬午修居庸關城

六年十一月脩宣大鎮城

正統九年十月拓甯夏城

十年六月脩京城內垣

景泰元年正月增築紫荊關城築倒馬關內城七月城臨

清十月都督孫安修復獨石馬營等處邊城

已上大政記

築永安城於天壽山之南以居陵衛官軍後遂移昌平縣

治焉

憲章錄

二年十月復修宣大外邊城堡

天順五年四月築滄州城

已上大政記

成化初廣東布政使張瑄增築廣州新會諸城垣一十二

張瑄傳

十年總兵蔣琬上言太祖肇建南京城外復築土城以衛居民誠萬世之業今北京但有內城已巳之變敵騎長驅直薄城下可以爲鑒今西北隅故址猶存亟行勸募之令

濟以工罰成功不難章下所司

蔣貴傳

宏治十一年順天巡撫洪鐘繕復城堡二百七十所悉城

緣邊諸縣

洪鐘傳

十四年秦紘總制三邊軍務修築諸邊城堡一萬四千餘

所

秦紘傳

十七年二月都御史楊一清請剏立陝西各處城堡從之

嘉靖四年二月丁未發團營卒五千人修都城

七年三月添築甯夏邊城

已上大政記

王儀遷山西右參政按行所部築城郭榆次平定間遂皆

有城

王儀傳

吳桂芳遷揚州知府建議增築外城揚有二城自桂芳始

吳桂芳傳

李承勛巡撫遼東凡爲城塹各九萬一千四百餘丈墩堡

百八十有一

李承勛傳

二十一年邊報日至都御史毛伯溫等言古者有城必有郭宜築外城下戶工二部議以匱乏停止三十二年給事中朱伯辰復言高皇帝定鼎金陵於時卽築外城聖慮宏遠蓋爲萬年計也文皇帝移都北平密邇邊塞顧有城無郭者則締造方始未暇盡制耳臣竊見城外居民繁夥無慮數十萬戶且四方萬國商旅貨賄所集不宜無以圉之

矧今邊報屢警不可不及時圖之臣嘗履行四郊咸有土城故址環繞周規可百二十餘里若仍其舊貫增庫培薄補缺續斷即可事半而功倍矣疏入命相度外城舊址周圍共七十餘里擇日興工築正南一面轉抱東西角三編質實三邊總督王以旂在鎮六年修延綏城堡四千五百餘所

王以旂傳

四十二年十二月乙巳工部尙書雷禮奏京師永定等七門當添築甕城東西便門接都城止丈餘又垛口卑隘濠池淺狹悉宜崇甃深濬上諭禮亟行之實錄

萬曆三十三年正月重修京師外城

同上

崇禎元年工部侍郎蔡國用督修都城需石甚急不克辦
國用建議取牙石用之牙石者舊列崇文宣武兩街備駕
出除道者也帝閱城嘉其功遂欲大用

程國祥傳

邊牆

成化十年延綏巡撫余子俊築邊牆延袤千七百七十里

余子俊傳

十三年正月增修遼東牆堡

十五年十一月築甯夏沿河邊牆

已上大政記

宏治六年二月御史李善請築遼東邊牆

明政統宗

十年修大

同邊牆

正德十六年九月修延綏三山堡定邊營等處邊牆

嘉靖七年二月補築陝西邊牆從楊一清請也

十九年六月修甯武偏頭等處邊牆

已上大政記

二十一年宣大總督翟鵬浚濠築垣修邊牆三百九十餘

里

本傳

二十三年宣大總督翁萬達議築邊牆自宣府西陽河洗

馬林張家口諸處爲牆六十四里自大同東路天城陽和

開山口諸處爲牆百二十八里既又修大同西路宣府東

路邊牆凡八百里寇乃不敢輕犯

翁萬達傳

三十三年賈應春總督宣大在鎮數載築邊垣萬一千八

百餘丈

賈應春傳

三十六年四月詔修薊鎮邊牆明政統宗十二月大築宣大邊

牆大政記

萬厯元年孫丕揚巡撫保定諸府築邊牆萬餘丈

孫丕揚傳

驛傳

自京師達於四方設有驛傳在京曰會同館在外曰驛曰遞運所以便公差來往有軍情重務必給符驗以防詐僞至於公文遞送又置鋪舍以免稽遲

各驛馬夫置銅鈴遇緊急公務懸帶馬上前路驛聽候鈴

聲隨卽供應

已上會典

洪武元年正月庚子置各處水馬驛站遞運所急遞鋪九

月甲寅改各站爲驛

大政記

三年設開平衛置八驛東則涼亭沈河賽峯黃厓四驛接大甯西則桓州威虜明安隰甯四驛接獨石開平廢而八驛亦爲棄地矣

方輿紀要

五年九月諭中書省自今驛傳必以丁糧多者充之有司

務加存恤

昭代典則

七年北平按察司副使劉崧請減僻地驛馬以益宛平帝

可其奏

劉崧傳

八年三月定馬夫免糧則例自京會同館至宿州十三驛

租全免自百善道至鄭州免三之二自滎陽至陝西山西

北平驛百二十一免三之一

王圻考

延安侯唐勝宗坐擅馳驛騎奪爵

唐勝宗傳

十六年四月松潘衛指揮僉事耿忠言臣所轄松潘等處安撫司屬各長官司宜以其戶口之數量其民力歲令納馬置驛而籍其民充驛夫供徭役從之

土司傳

十七年景川侯曹震上言四川至建昌驛道經大渡河往來者多死瘴癘詢之父老自眉州裁眉至建昌有古驛道平易無瘴毒已令軍民修治請以瀘州至建昌驛馬移置裁眉新驛從之後至瀘州又闢陸路作驛舍郵亭

藍玉傳

二十年九月北平布政使請自河間景州至永平撫甯馬驛吳橋至通州水驛各增馬及船從之

十月定勲戚出使非奉符驗不得乘驛

已上大政記

二十三年正月庚午遣鳳翔侯張龍等往雲南置驛傳

昭代

典則

二十七年六月增遞運驛夫糧額

永樂元年十一月丁亥定驛傳事例

二年六月令各處軍情急務方許給驛

三年九月命福建浙江廣東市舶提舉司各置驛以館海外諸番朝貢之使

宣德四年七月乙巳朔置驛勘合

已上大政記

禮部侍郎鄒師顏卒命驛舟送之詔京官卒者皆給驛著

爲令

夏原傳

六年二月許進表官得宿驛舍御史得乘驛馬

初止騎驢

五月令南京府部寺院堂上官以公事至京者得給驛

七年二月給衍聖公孔彥縉乘驛

八年三月令沿河州縣有驛遞者悉免其民雜役又詔方

面官按部許給驛

已上大政記

兵部尙書張本疏驛馬之設本以報軍機重務今在外凡有符驗官司及鎮守中官每以常事泛濫給驛皆宜禁今

請令年終各具一歲給驛起數及所幹事務所差人員造

冊奏聞以憑稽覈從之

春明夢餘錄

正統中方面以公事行部者例不給驛貴州按察使應履

平言僦車舟必擾民請給驛便從之

應履平傳

義門鄭氏族大不能自給又買馬出丁供山西郵傳困甚

以金華府通判劉實言獲免

劉實傳

宏治三年四月定驛遞馬戶地遠者出銀所在自買通行

天下從浙江巡按陳金奏也

大政記

萬厯初張居正議布按二司以下官雖公事毋許乘驛馬

而南京兵部主事趙世卿請寬驛傳之禁

趙世卿傳

四十二年保定巡撫王紀言驛遞之設以供命使之往來
非以供寺令魚肉今中使李永妄作威福墩鎖驛夫非刑
拷打與寇盜何異請敕法司嚴拏究問不納

明臣
奏議

崇禎二年毛羽健陳驛遞之害言兵部勘合有發出無繳
入士紳遞相假借一紙洗補數四差役之威如虎小民之

命如絲帝卽飭所司嚴加釐革

毛羽
健傳

朝議裁驛卒韓爌言

驛傳疲累當責按臣覈減以甦民困其所節省仍還之民

帝然之

韓爌
傳

四月甲午裁驛站冗卒山陝游民仰驛糴者

無所得食皆從賊

三編

時大釐郵傳積弊減削過甚反累民范復粹巡按江西極

陳不便

程國祥傳

三年給事中魏呈潤疏言驛站所裁纔六十萬未足充軍餉十一而郵傳益疲勢必再編里甲是猶剜肉醫瘡瘡未瘳而肉先潰也

魏呈潤傳

明會要卷七十五終

明會要卷七十六

永新龍文彬

方域六

黃河

洪武八年正月河決開封壞大黃寺隄百餘丈詔河南參政安然發民夫三萬人塞之

十七年八月河決開封東月隄自陳橋至陳留橫流數十里又決杞縣入巴河遣官塞之

二十三年二月河決歸德東南鳳池口經夏邑永城發興武等十衛士卒與歸德民併力築之

二十四年四月河決原武黑羊山東經開封城北又東南由陳州項城太和潁州潁上東至壽州正陽鎮全入於淮而賈魯河故道遂淤又由舊曹州鄆城漫東平之安山元會通河故道亦淤

二十五年正月河決陽武旁浸陳州中牟原武封邱祥符蘭陽陳留通許太康扶溝杞十一州縣發民丁及安吉等十七衛軍士修築其冬大寒役遂罷

三十年八月決開封城三面受水詔改作倉庫於滎陽以備不虞冬蔡河徙陳州先是河決由開封北東行至是下流淤又決而之南

永樂八年八月河溢開封壞城二百餘丈民被患者萬四千餘戶沒田七千餘頃帝遣工部侍郎張信往視信言祥符魚王口至中灤下二十餘里有舊黃河岸與今河面平濬而通之使循故道則水勢可殺因繪圖以進時尙書宋禮侍郎金純方開會通河帝乃發民丁十萬命興安伯徐亨侍郎蔣廷瓚偕純相治并令禮總其役乃引河自封邱金龍口下魚臺塌場會汶水由徐呂二洪南入於淮是時會通河已開黃河與之合漕道大道而河南水患亦稍息

已上河渠志

景泰三年河決沙灣七載前後治者皆無功廷臣共舉徐

有貞乃擢僉都御史往治之有貞至張秋上三策一置水門一開支河一濬運河議既定督漕都御史王竑以漕渠淤淺滯運請急塞決口帝敕有貞如竑言有貞守便宜言臨清河淺舊矣非因決口未塞也漕臣但知塞決口爲急不知秋冬雖塞來春必復決徒勞無益臣不敢邀近功詔從其言有貞於是大集民夫躬親督率治渠建牐起張秋以接河沁河流之旁出不順者爲九堰障之更築大堰槌以水門閱五百五十五日而工成名其渠曰廣濟牐曰通

源

徐有貞傳

天順七年河南布政司照磨金景輝上言國初黃河在封

邱後徙康王馬頭去城北三十里復有二支河一出沙
注運河一由金龍口達徐呂入海正統戊辰決滎澤輒
城南併流入淮舊河支河俱堙漕河因而淺澁夫河不循
故道併流入淮是爲妄行今急宜疏導以殺其勢若止委
之一淮而以隄防爲長策第恐開封終爲魚鱉之區乞敕
部檄所司先疏金龍口寬闊以接漕河然後相度舊河或
別求泄水之地挑濬以平水患爲經久計命如其說行之
成化十四年九月河決開封壞護城隄五十丈河南巡撫
李衍上言河南屢有河患皆下流壅塞所致宜疏開封西
南新城地下抵梁家淺舊河口以洩杏花營上流而自八

角河口抵南頓則當分導之以散其勢庶可免祥符鄆陵
睢陳歸德之災帝敕衍酌行之

已上河渠志

宏治二年五月河決開封命戶部侍郎白昂往治之乃役
夫二十五萬築陽武長隄以防張秋引中牟決河出滎澤
濬宿州古汴河又濬歸德津河使河流入汴汴入睢睢入
泗泗入淮以達海南北分治水患稍甯

三編

六年河決張秋命副都御史劉大夏往治之時河流湍悍
決口闊九十餘丈大夏行視之曰是下流未可治當治上
流乃自黃陵岡浚賈魯舊河復浚孫家渡四府營上流以
分水勢而築長隄起胙城抵徐州互三百六十里水大治

鄒滕之水以一隄捍羣流豈能不潰宜分之以殺其勢衡

乃開支河四洩其水入赤山湖

朱衡傳及三編

隆慶三年七月河決沛縣漕艘不得進四年九月復決邳州自睢甯白浪淺至宿遷小河口淤百八十里漕道復阻河道侍郎翁大立言邇來河患不在豐沛而在徐邳臣以爲權宜之計在乘故道而就新衝經久之策在開泇河以避洪水帝命大立躬自相度條利害以聞已而大立以誤漕削籍復以朱衡經理河道遂罷泇河議專事徐邳築長隄自徐州至宿遷小河口三百七十里并繕豐沛大黃隄正河安流運道乃通

三編衡乃上言河南屢被河患大爲隄

防今幸有數十年之安者以防守嚴而備禦素也徐邳爲糧運正道旣多方以築之則宜多方以守之請用夫每里十人以防三里一鋪四鋪一老人巡視伏秋水發時五月十五日上隄九月十五日下午隄願攜家居住者聽詔如議

河渠志

六年命萬恭總理河漕恭築兩隄北自磨臍溝迄邳州直河南自離林迄宿遷小河口各延三百七十里六十日而成高寶諸河夏秋汎濫歲議增隄而水益漲恭緣隄建平水牯二十餘以時蓄洩專令溶湖不復增隄河遂無患

傳

萬恭

萬厯三年八月河決碭山而北淮亦決高家堰而東徐邳
淮南北漂沒千里河道淤淺阻漕者數年明年二月督漕
侍郎吳桂芳言淮揚洪潦奔流惟雲梯關一徑入海致海
湧橫沙河流迅溢而鹽安高寶諸州縣所在受災請益開
草灣及老黃河故道以廣入海之路脩築高郵東西二湖
以蓄湖水皆下所司議行吳桂芳傳未幾草灣河工告成五年
八月河復決崔鎮宿沛清桃兩岸多壞黃河日淤墊淮水
爲河所迫徙而南河臣傅希摯議塞崔鎮決口東水歸漕
而桂芳欲衝刷成河以爲老黃河入海之路帝令急塞決
口而俟水勢稍定乃從桂芳言河渠志

六年二月以潘季馴總理河漕季馴上兩河經略疏曰今
談河務者皆以濬海爲上策豈知海無可濬之理惟當導
河以歸之海則以水治水卽濬海之策也河亦非可以人
力導也惟當繕治隄防俾無旁決則水由地中沙隨水出
卽導河之策也今欲濬海必先塞決以導河尤當固隄以
杜決而欲隄之不決必眞土而勿雜浮沙高厚而勿惜鉅
費讓遠而勿與爭地則隄乃可固此以水治水之法也條
上六事詔如議編三季馴凡四治河至二十年放歸條上辨
惑者六事力言河不兩行新河不當開支渠不當濬又著
書曰河防一覽大旨在築隄漳河束水歸漕築堰障淮逼

淮注黃以清刷濁沙隨水去合則流急急則蕩滌而河深
分則流緩緩則停滯而沙積上流既急則海口自闕而無
待於開治隄之法有縷隄以束其流有遙隄以寬其勢有
滾水壩以洩其怒法甚詳言甚辨

十六年三月給事中王士性上言黃河自徐而下河身日
高而爲隄以束之隄與徐州城等委全力於淮而淮不任
黃水灌運河如建瓴淮安高寶鹽興諸生民託之一丸泥
決則盡化魚鱉矣紛紛之議有欲增隄泗州者有欲開顏
家灌口永濟三河南登高家堰北築滾水壩者總不如復
河故道爲一勞永逸之計也河故道由三義鎮達葉家衝

與淮合在清河縣北別有濟運河在縣南蓋支河耳河強奪支河直趨縣南而自棄北流之道然河形固在也自桃源至瓦子灘凡九十里窪下不耕無室廬墳墓之礙雖開河費鉅而故道一復爲利無窮章下所司給事中常居敬言故道難復不行

已上河渠志

二十四年九月河決單縣時徐泗淮揚間無歲不苦水患總河楊一魁旣議分疏黃淮於是役夫二十萬開桃源黃河壩新河起黃家嘴至安東五港灌口長三百餘里分洩黃水入淮闕清口沙七里建武家墩高良礮周家橋石牯洩淮水三道入海且引其支流入江於是泗陵水患平而

淮揚得無患然一魁專力桃源淮泗間而上流單縣黃堍口之決如故後以黃堍口不塞致衝祖陵斥一魁爲民

二十六年命工部侍郎劉東星總理河漕初季馴議開黃河上流循商邱虞城而下歷丁家道口出徐州小浮橋卽元賈魯所浚故道也朝廷以費鉅不果東星卽其地開濬起曲里鋪至三仙臺抵小浮橋又濬漕渠自徐邳至宿遷凡五閱月工竣明年濬邵伯界首二湖又明年開泇河南通淮海引漕甚便

已上
三編

三十二年正月總理河道侍郎李化龍請開泇河口疏言河自開封歸德而下合邗入海其路有三由蘭陽出茶城

向徐邳名濁河爲中路由曹單豐沛出飛雲橋向徐溝名
銀河爲北路由潘家口入宿遷出小河口名符離河爲南
路南路近陵北路近運惟中路旣遠於陵亦濟於運前河
臣興役未竣然自堅城以至鎮口河形尙在故爲今計惟
循故迹開泇河爲便上從之九月分水工成紀事本末由直河
入泇口抵夏鎮凡二百六十里避黃河呂梁之險遂爲漕

道水利

三編

三十三年十月濬朱旺口先是化龍上言泇河旣成河不
能爲運河害獨朱旺口以上決單則單沼決曹則曹魚及
豐沛徐邳魚碭皆命懸一綫隄防宜急會化龍憂去曹時

聘代大濬朱旺口役夫五十萬六閱月工竣自朱旺達小

浮橋延袤百七十里渠廣隄厚河歸故道焉

同上

四十年九月河決徐州三山衝縷隄二百八十丈遙隄百七十餘丈黎林鋪以下二十里正河悉爲平陸邳睢河水耗竭總河都御史劉士忠開韓家壩外小渠引水由是壩以東始通舟楫

天啟四年河決徐州魁山隄東北灌州城城中水深一丈三尺徐民苦渰溺議集貲遷城給事中陸文獻上徐城不可遷六議而勢不得已遂遷州治於雲龍河事置不問矣崇禎六年總河朱光祚議開高堰三牐淮揚在朝者合疏

言建議諸口未成民田盡沈水底三牐一開高寶諸邑蕩
爲湖海而漕糧鹽課皆害矣高堰建牐始於萬厯二十三
年未幾全塞今高堰日壞方當急議修築可輕言開濬乎
帝是其言事遂寢

已上河渠志

運河

洪武元年河決曹州命大將軍徐達開塌場口入於泗以
通運而徙曹州治於安陵

九年令揚州修高郵寶應湖隄六十餘里以捍風濤

十六年儀真縣重建清口牐惠橋腰牐南門裏朝牐以蓄

洩水利以通漕舟從尙書單安仁請也

已上世法錄

二十六年九月命崇山侯李新開溧水臙脂河以通浙漕

免丹陽輸輓及大江風濤之險

昭代典則

永樂九年浚會通河河爲元轉漕故道岸狹沙淺元末已廢不用洪武中復因河決遂淤至是命工部尙書宋禮與侍郎金純往治之禮以會通之原必資汶水乃用汶上老人白英策築壩東平之戴村遏汶流使南無入洸北無歸海匯諸泉之水盡出南旺中分爲二道以四分南流接徐沛六分北流達臨清南旺地勢高決其水南北皆注所謂水脊也因相地勢置牐三十有八以時蓄洩禮又請疏東平沙河合馬常泊之流以益汶運道乃成

三編

十二年平江伯陳瑄請鑿呂梁百步二洪置呂梁石牐又
建淮安五壩仁義二壩在東門外東北禮智信三壩在西
門外西北皆自城南引湖水抵壩口其外卽淮河遇清江
口淤塞則漕船由二壩官民商船由三壩入淮世法錄先是

漕至淮安陸運以達清河勞費甚鉅陳瑄采故老言自淮
安城西管家湖鑿渠二十里卽宋喬維嶽所開沙河舊渠
爲清江浦導湖水入淮置四牐以宣洩又緣湖十里築隄
引漕舟直達於河十三年五月工成瑄又築沛縣刁陽
湖濟甯南旺湖長隄開泰州白塔河通大江築高郵湖隄
於隄內鑿渠四十里陳瑄傳並築寶應汜光白馬諸湖隄自

是漕運直達通州而海陸運俱廢

河渠志

宣德六年用御史白圭言濬金龍口引河水達徐州以便

漕

同上

正統七年參將楊節因徐州洪水迅急敗舟建議於上流

築堰逼水悉歸月河於月河南口設牐以蓄水勢

世法錄

宏治二年河決張秋衝會通河命戶部侍郎白昂相治昂奏金龍口決口已淤河併爲一大支由祥符合沁下徐州而去其間河道淺隘宜於所經七縣築隄岸以衛張秋下工部議從其請昂又以漕船經高郵暨社湖多溺請於隄東開複河四十里以通舟賜名曰康濟

六年河決張秋東隄奪汶水入海漕流絕副都御史劉大夏奉敕往治先自決口兩岸鑿月河以通漕經營二年張秋決口既塞復築黃陵岡上流於是河復南下運道無阻自昂開康濟大夏塞張秋漕河上下無大患者二十餘年十六年巡撫徐源乞毀岡城石堰復易以土疏洸口壅塞以至濟甯而築岡城迤西春城口子決岸帝命侍郎李鏐往勘言岡城石堰一可遏淤沙不爲南旺河之害一可殺水勢不慮戴村壩之衝不宜毀近堰積沙宜濬岡城稍東有元時舊牐引洸水入濟甯下接徐呂漕河東平州戴村則汶水入海故道也自永樂初橫築一壩遏汶入南旺湖

漕河始通今自分水龍王廟至天井牕九十里水高三丈有奇若洸河更濬而深則汶流盡向濟甯而南臨清河道必涸洸口不可濬垆城口至柳泉九十里無關運道可弗事柳泉至濟甯汶泗諸水會流處宜疏者二十餘口春城口外障汶水內防民田隄卑岸薄宜與戴村壩並修築從之

嘉靖六年詹事霍韜謂前議役山東河南丁夫數萬疏濬淤沙以通運然沙隨水下旋濬旋淤今運舟由昭陽湖入雞鳴臺至沙河迂迴不過百里若沿湖築隄浚爲小河河口爲牕以時蓄洩水溢可避風濤水涸易爲疏濬三月而

土隄成一年而石隄成較之役丁夫以浚淤土勞逸大不
侔也尙書李承勛請於昭陽湖左別開一河引諸泉爲運
道自留城沙河爲尤便與都御史胡世甯議合未幾總河
盛應期從其策未畢工而罷後三十年朱衡濬而成之
隆慶二年總河翁大立上言漕河資泉水而地形東高西
下非湖瀦之則涸故漕河以西皆有壑黃流逆奔則以昭
陽湖爲散漫之區山水東突則以南陽湖爲瀦蓄之地宜
由回回墓開道以達鴻溝令穀亭湖陵之水皆入昭陽湖
卽濬鴻溝廢渠引昭陽湖水治渠東出留城三年又請鑿
邵家嶺令水由地浜溝出境山入漕河帝皆從之

是年從雒遵言修築茶城至清河長隄五百五十里接築
茶城至開封兩岸隄從朱衡言繕豐沛大黃隄衡又言漕
河起儀真訖張家灣二千八百餘里河勢凡四段各不相
同清江浦以南臨清以北皆遠隔黃河不煩用力惟茶城
至臨清則牐諸泉爲河與黃相近清河至茶城則茶城卽
運河也茶城以北當防黃河之決而入茶城以南當防黃
河之決而出防黃河卽所以保運河故自茶城至邳遷高
築兩隄宿遷至新河盡塞決口二處告竣故河深水束無
旁決中潰之虞沛縣之窯子頭至秦溝口應築隄七十里
接古北隄徐邳之間隄逼河身宜於新隄外別築遙隄詔

明倫彙編 家範典 卷一百一十五
如其議

萬厯元年總河侍郎萬恭言祖宗時造淺船近萬非不知
滿載省舟之便以牐河流淺不敢過四百石也其制底平
倉淺用水不得過六拏伸大指與食指相距爲一拏六拏
不過三尺許明受水淺也今不務遵行而競雇船搭運雇
船有三害搭船有五害皆病河道請悉遵舊制從之恭又
請復淮南平水諸牐言牐欲密則水疏無漲瀰患牐欲狹
則勢緩無齧決虞又建天妃廟口石牐復境山舊牐部皆
覆行之爲運道永利

十五年督漕侍郎楊一魁請修高家堰以保上流砌范家

口以制旁決疏草灣以殺河勢修禮壩以保新城詔從其請

十九年總河潘季馴言宿遷以南地形西窪請開縷隄放水沙隨水入地隨沙高庶水患消而費可省又請易高家堰土隄爲石築滿家壩西攔河壩使汶泗盡歸新河設減水壩於李家口以洩沛縣積水從之

四十四年巡漕御史朱階請修復泉湖言宋禮築壩戴村奪二汶入海之路灌以成河復導洙泗洸沂諸水以佐之汶雖率眾流出全力以奉漕然行遠而竭已自難支至南旺又分其四以南迎淮六以北赴衛力分益薄况此水夏

秋則漲冬春而涸無雨卽夏秋亦涸禮逆慮其不可恃乃於沿河昭陽南旺馬踏蜀山安山諸湖設立斗門名曰水櫃漕河水漲則瀦其溢出者於湖水消則決而注之漕積泄有法盜決有罪故旱澇恃以無恐及歲久禁弛湖淺可耕多爲勢豪所占昭陽一湖已作藩田比來山東半年不雨泉欲斷流按圖而索水櫃茫無知者乞敕河臣清覈亟築隄壩斗門以廣蓄儲帝從其請

天啟三年王家集磨兒莊湍溜日甚漕儲參政朱國盛謀改濬一河以爲漕計令同知宋士中自泃口迤東抵宿遷陳溝口復泝駱馬湖上至馬頰河往迴相度乃議開馬家

洲且疏馬頰河口淤塞上接泃流下避劉口之險又疏三
汭河流沙十三里開沿莊河百餘丈濬深小河二十里開
王能莊二十里以通駱馬湖口築塞張家等溝數十道東
水歸漕計河五十七里名通濟新河五年四月工成運道
從新河無劉口磨兒莊諸險之患明年總河侍郎李從心
開陳溝地十里以竟前工

崇禎十四年總河侍郎張國維言濟甯運道自棗林牯湖
師家莊仲家淺二牯歲患淤淺每引泗河由魯橋入運以
濟之伏秋水漲足資利涉而挾沙注河水退沙積利害參
半旁有白馬河匯鄒縣諸泉與泗合流而出魯橋力弱不

能敵泗河身半淤不爲漕用然其上源寬處正與仲家淺
牕相對導令由此入運較魯橋高下懸殊且易細流爲洪
流又減沙滲之患而濟仲家淺及師莊棗林有三便復上
疏運六策皆命酌行

已上河渠志

明會要卷七十六終

明會要卷七十七

永新龍文彬纂

外蕃一

正東

朝鮮

朝鮮本箕子所封國也漢末有扶餘高氏據其地改國號曰高麗居平壤後唐時王建代高氏闢地益廣以平壤爲西京迄宋遼金四百餘年未始易姓元至元中西京內屬置東甯路總管府畫慈悲嶺爲界其俗尙柔謹知文字喜讀書士女服尙白

洪武元年遣使賜王顥璽書二年顥表貢方物且請封詔
賜金印誥文封爲高麗國王顥復遣成惟德等上表謝賜
以六經四書通鑑

三年正月命使往祀其國之山川頒科舉詔顥表謝貢方
物并納元所授金印

五年表請遣子弟入大學帝曰入學固美事但涉海遠不
欲者毋強時貢使失風洪師範等三十九人溺焉帝憫之
謂中書省臣曰高麗貢獻繁數旣困敝其民涉海復虞覆
溺宜遵古諸侯之禮三年一聘貢物唯所產毋過侈其明
諭朕意

七年顯爲權相李仁人所弑而立寵臣辛旽之子禍連年貢方物卻之

二十年命戶部咨高麗王鐵嶺北東西之地舊屬開元者遼東統之鐵嶺之南舊屬高麗者本國統之各正疆境毋侵越

二十一年禍表言鐵嶺之地實其世守乞仍舊便帝曰高麗舊以鴨綠江爲界今飾辭鐵嶺詐僞昭然其以朕言論之俾安分毋生釁端是年禍傳位子昌二十二年李成桂廢昌復立王氏裔定昌國院君瑤

二十五年瑤出居原州成桂主國事更名旦遣使請改國

日知錄卷十二
號命仍古號曰朝鮮王氏自五代傳國數百年至是始絕
建文初旦子芳遠襲位永樂元年芳遠請冕服書籍許之
十六年芳遠陳已年老請以子禔理國事乃封禔爲國王
時帝已遷北都朝鮮益近而事大之禮益恭朝廷亦待以
加禮他國莫敢望也

宣德八年禔請遣子弟入學不許賜五經四書性理通鑑
綱目諸書正統七年諭禔曰鴨綠江一帶東甯等衛密邇
王境中多細人逃至王國或被國人誘脅去者無問漢人
女真至卽解京九年春倭寇犯邊禔命禽獲五十餘人械
送京師十年又獲餘黨來獻帝敕獎之

天順三年邊將奏有建州三衛都督私與朝鮮結恐爲中國患因諭國王李瑋曰宣德正統年間以王國與彼互相侵掠敕解怨息兵初不令交通給賞授官也彼旣受朝廷官職王又加之是與朝廷抗也王素秉禮義何爾文過飾非後宜絕私交以全令譽

成化十二年國王瑋因禁外國互市兵器奏小邦北連野人南鄰倭島高皇帝時嘗賜火藥火礮今望特許收買弓角不與外番同禁兵部議歲市弓角五十後以不足於用請無限額詔許倍市

十五年命瑋出兵夾擊建州女真十六年遣陪臣來獻捷

帝命齋敕獎賜

宏治十二年國王倭奏本國人屢有違禁匿海島誘引軍民漸至滋蔓乞許本國自行按刷其係上國地方請敕官追捕報可

嘉靖二十六年國王峇峇稱福建人從無泛海至本國者因往日本市易爲風所漂前後共獲千人以上皆挾軍器貨物致中國火礮亦爲倭有恐起兵端詔頃年沿海奸民犯禁福建尤甚往往爲外國所獲有傷國體海道官員令巡按御史查察仍賜王銀幣以旌其忠

三十一年冬以洪武永樂間所賜樂器敝壞奏求律管更

乞遣樂官赴京校習之

三十五年有倭船四自浙直敗還漂入朝鮮境喧遣兵擊殲之得中國被俘及助逆者三十餘人帝賜璽書褒諭三十八年奏五月有倭寇駕船二十五隻來抵海岸臣命將李鐸等勦殺殆盡獲中國民陳春等三百餘人內招通倭嚮導陳得等十六人俱獻闕下復降敕獎勵厚資銀幣

初成桂之自立也與宰相李仁人本異族永樂間降祭海嶽祝文稱成桂爲仁人子而祖訓亦載仁人子成桂更名旦後成桂子芳遠奏辨太宗許令改正及修大明會典仍列祖訓於朝鮮國貢使市以歸其王懌上疏備陳世系辨

先世無弑逆事乞改正詔曰可至嘉靖四十二年岺復上書辨先世非李仁人後今修會典雖蒙釐正乞著始祖旦父子春之名帝令附錄會典

萬厯元年朝鮮王昞請賜皇明會典以終前命許之

二十年日本關白平秀吉窺朝鮮無備分遣行長清正等率舟師逼釜山鎮昞棄王城奔平壤已復走義州八道幾盡沒遣使求援中國乃以宋應昌爲經略李如松爲提督分布諸將屢戰敗衄至二十六年平秀吉死諸倭撤兵去而朝鮮之禍始息

二十七年敕諭昞曰倭奴平秀吉肆爲不道蹂躪爾邦朕

念王世篤忠貞深用憫惻七年之中日以此賊爲事神惡
凶盈陰殲魁首大師乘之追奔逐北鯨鯢盡戮海隅載清
捷書來聞憂勞始釋惟王雖還舊物實同新造振凋起敝
爲力倍艱倭雖遁歸族類尙在茲命邢玠振旅歸京量留
萬世德等分布戍守王宜臥薪嘗膽無忘前恥惟忠惟孝
續紹前休

是年八月詔請留水兵八千以資戍守其撤回官兵駐紮
遼陽備警二十八年四月請將義州等倉遺下米豆運回
遼陽戶部議輸運維艱莫若徑與彼國振其彫敝以昭皇
仁詔曰可

朝鮮與對馬島一水相望島地不產五穀資米於朝鮮兵興後絕開市因百計脅款秀吉死我軍盡撤朝鮮畏倭滋甚欲與倭通款又懼開罪中國二十九年畋以島倭求款來請命兵部以事難遙度令總督世德酌議詔可

四十七年楊鎬出師爲我

大清兵所敗朝鮮助戰兵將或降或戰死國王璉告急詔加優恤

天啟元年改朝鮮貢道自海至登州直達京師時毛文龍以總兵鎮皮島招集逃民爲兵而仰給於朝鮮璉奏力難饋餉乞循萬厯東征例發運山東粟從之

天啟七年二月

大清兵征朝鮮度鴨綠江朝鮮及毛文龍同告急朝命袁崇煥發兵往援崇煥以水師援文龍遣趙率教等九將將精卒逼三岔河爲牽制之勢而朝鮮已爲

大清所服諸將悉引還崇禎二年崇煥殺文龍雙島旣而國王倬與我

大清背約陰持兩端

編三

太宗文皇帝親征責其渝盟助明之罪朝鮮告急命總兵陳洪範調各鎮舟師赴援方出海山東巡撫顏繼祖奏屬國失守江華已破今大治舟艦來攻皮島鐵山請急救洪

範及沈世魁堅守皮島無何皮島並爲

大清兵所破朝鮮遂絕不數載而明亦亡矣

日本

日本古倭奴國唐咸亨初改日本以近東海日出而名也地環海惟東北限大山有五畿七道三島東輿州出黃金西別島出白銀水多陸少俗以捕魚爲業國王以王爲姓文武僚吏皆世官

洪武二年寇山東帝遣行人楊載招諭其國日本王良懷不奉命

四年遣僧祖來奉表稱臣貢方物帝以其俗佞佛可以西

方教誘之遣僧祖闡等送使者還賜良懷大統厯及文綺
紗羅祖闡等至良懷拘之二年始放還

七年遣僧來貢而無表帝命卻之其別島守臣亦遣僧奉
表來貢帝以無國王之命且不奉正朔亦卻之命禮臣移
牒責之

九年遣僧圭廷用等來貢且謝罪帝惡其表辭不誠降詔
戒諭宴賚使者如制

十七年遣僧如瑤來貢因與胡惟庸通謀事發帝怒日本
特甚決意絕之然王子滕祐壽者來入國學帝猶善待之
特授觀察使後著祖訓列不征之國十五日本與焉自是

朝貢不至而海上之警亦漸息

永樂二年遣使招諭海外諸番日本首先納款降敕褒獎給勘合百道定以十年一貢船止二艘人止二百違例卽以寇論

是年十一月來賀冊立皇太子時對馬臺岐諸島賊掠濱海居民因諭其王捕之王發兵盡殲其眾繫其魁二十人獻於朝帝嘉之賜王九章冕服及錢鈔錦綺加等

四年封其國中山爲壽安鎮國之山御製碑文立其上六年封源義持爲日本國王時海上復以倭警告遣官諭義持勦捕八年義持遣使謝恩獻所獲海寇帝嘉之

九年遣王進齋敕褒賚其君臣謀阻進不使歸進從他道遁還自是久不貢

十五年倭寇松門金鄉平陽有捕倭寇數十人至京者廷臣請正法帝曰威之以刑不若懷之以德宜還之乃遣使責讓令悔罪自新明年其王遣使來貢謝罪帝以其詞順許之禮使者如故然海寇猶不絕

宣德七年帝念四方蕃國皆來朝獨日本久不貢命中官柴山往琉球令其王轉諭日本賜之敕明年夏王源義教遣使來帝嘉賚之又申定要約人毋過三百舟無過三艘而倭人貪利貢物外所攜私物增十倍給銀價數萬猶快

快去

英宗嗣位遣使來貢工部言宣德間日本諸國皆給信符勘合今改元伊始例當更給從之

景泰四年入貢至臨清掠居民貨有指揮往詰毆幾死所司請執治帝恐失遠人心不許倭性黠時載方物戎器出沒海濱得間則張其戎器而肆侵掠不得則陳其方物而稱朝貢

成化四年夏遣使貢馬謝恩禮之如制十一月使臣清啟復來貢傷人於市有司請治其罪詔付清啟奏言犯法者當用本國之形容還國如法論治帝赦之自是使者益無

忌

宏治九年王源義高遣使來還至濟甯其下復持刀殺人
所司請罪之詔自今止許五十人入都餘留舟次嚴防禁
焉

嘉靖九年琉球使臣蔡瀚者道經日本其王源義晴附表
言向因本國多事干戈梗道正德勘合不達東都以故素
卿捧宏治勘合行乞貸遣望并賜新勘合金印脩貢如常
禮官驗其文無印篆言倭謫詐難信宜敕琉球王傳諭仍
遵前命

十九年二月貢使至京申前請乞賜嘉靖新勘合部議勘

合不可遽給務繳舊易新貢期限十年人不過百舟不過三詔如議

二十三年復來貢未及期且無表文卻之其人利互市留海濱不去巡按御史高節請治沿海文武將吏罪嚴禁奸豪交通得旨允行而內地諸奸利其交易多爲之囊橐終不能盡絕

二十六年遣使周良等先期來貢用舟四人六百泊於海外以待明年貢期事聞帝以先期非制且人船越額敕守臣勒回明年六月良復求貢浙江巡撫朱統以聞禮部言日本貢期及舟與人數雖違制第表辭恭順去貢期亦不

遠若概加拒絕則航海之勞可憫宜敕執循十八年例起送五十人餘留嘉賓館量加犒賞報可執力言五十人過少乃令百人赴都部議但賞百人良訴貢舟高大勢須五百人中國商舶入海往往藏匿島中爲寇故增一舟防寇非敢違制部議量增其賞從之當是時日本王雖入貢其各島諸倭歲常侵掠濱海奸民又往往勾之執乃嚴爲申禁獲交通者輒以便宜斬之又數騰疏於朝言大姓通倭狀言官交章詆執執自殺自是海禁復弛倭患日劇

萬曆十四年倭酋平秀吉起人奴因關白信長爲其下所弑秀吉遂統其兵僭稱關白征服旁近諸小國并欲滅朝

鮮而有之二十年師渡海直逼王京朝鮮告急乃命李如松等討之互有勝敗久之秀吉死諸倭兵退朝鮮之患始平秀吉凡再傳而亡

婆羅

婆羅又名文菜東洋盡處也永樂三年遣使齎璽書綵幣撫諭其王四年其國東西二王並遣使奉表朝貢

王有金印一篆文作獸形永樂朝所賜民間嫁娶必請此印背上以爲榮

萬厯時爲國王者閩人也或言鄭和使婆羅有閩人從之留居焉其後人竟據有其國

後佛郎機舉兵來擊王率國人走山谷中放藥水流毒殺佛郎機無算因得返國

馮嘉施蘭

馮嘉施蘭東洋小國永樂四年八月其酋嘉馬銀等來朝貢方物賜鈔幣有差六年八年復來朝貢

蘇祿

蘇祿在東海中近淳泥閩婆有珠池夜望之光浮水面土人以珠與華人市易大者利數十倍

洪武初發兵征勃泥大獲其人畜以閩婆援兵至乃還其國分東王西王峒王而以東王爲尊永樂十五年三王

並率其妻子來朝進金縷表文獻珍珠寶石等物因並封
爲國王賜印誥襲衣冠帶及鞍馬儀仗器物居二十七日
三王辭歸東王次德州卒於館帝遣官賜祭命有司營葬
勒碑墓道賜諡曰恭定乃遣使齋敕封其長子爲蘇祿國
東王

十八年西王遣使入貢

十九年東王母遣使來朝貢大珠其重七兩有奇明年東
王妃還國厚賜遣之

二十二年復入貢自後不復至

合貓里

合貓里東海中小國近呂宋又名貓里務永樂三年遣使附瓜哇使臣朝貢商舶往來漸成富壤華人入其國不敢欺凌市法最平華人爲之語曰若要富須往貓里務

美洛居

美洛居俗譌爲米六合處東海中地有香山雨後香墮治流滿地居民取之不竭其酋委積充棟以待商舶之售故華人多往市易

萬厯時紅毛番與佛郎機交爭美洛居地每歲搆兵華人流寓者遊說二國令各罷兵分國中萬老高山爲界山以北屬紅毛番南屬佛郎機始稍休息而美洛居竟爲兩國

所分

東南

雞籠山

雞籠山在澎湖嶼東北故名北港又名東番去泉州甚邇
中多大溪流入海水淡故其外名淡水洋

永樂中鄭和遍至東西洋靡不獻琛恐後獨此番遠避不
至

嘉靖末雞籠山人遭倭焚掠避居山後嗣有紅毛番至此
因事耕鑿設閭闔稱臺灣焉

崇禎八年給事中何楷陳靖海之策以臺灣爲奸民之窟

欲逐去紅毛然後海氛可靖時不能用

琉球

琉球在東南海中與漳泉興福四州界相值其國有三王曰中山曰山南曰山北皆以尙爲姓而中山最强

洪武五年命行人楊載招諭之中山王察度遂遣使入貢賜賚有加於是山南王承察度山北王帕尼芝亦相繼臣服

二十五年中山王遣子姪及其陪臣子弟入國學上喜禮遇獨優賜閩人三十六姓善操舟者令往來朝貢

淵鑒類函

永樂中三王屢入貢子弟俱入國學肄業其嗣王立俱遣

使冊封之三王惟山北最弱故朝貢最稀後竟爲二王所併而中山益強以其國富一歲常再貢三貢天朝雖厭其煩不能卻也

宣德三年帝以中山王朝貢彌謹遣官齎敕往勞賜羅錦諸物山南自三年兩貢終帝世不復至亦爲中山王所併矣自是惟中山一國朝貢不絕

成化十一年禮官請定令二年一貢毋過百人不得附攜私物騷擾道途帝從之賜敕戒王其使者請如祖制比年一貢不許十四年使來復請禮官言其國連章奏請不過欲圖市易近年所遣之使多係閩中逋逃罪人殺人縱火

奸狡百端專貿中國之貨以擅外番之利所請不可許
宏治元年其貢使自浙江來禮官言貢道向由福建今旣
非正道又非貢期宜卻之詔可其使臣復以國王移禮部
文來上言舊歲知東宮冊妃故遣使來賀非敢違制禮官
乃請納之而稍減僕從賜賚以示裁抑之意

嘉靖二年從禮官議敕琉球二年一貢如舊制不得過百
五十人

萬曆二十三年世子尙甯遣人請襲福建巡撫許孚遠以
倭氛未息據先世鄭曉領封之議請遣官一員齎敕至福
建聽其陪臣面領歸國或遣習海武臣一人偕陪臣同往

禮官范謙議如其言且請待世子表至乃許

四十年日本入其國大掠而去已而其王復遣使脩貢然其國殘破已甚禮官乃定十年一貢之例

天啟三年世子尙豐遣使請貢請封禮官言舊制琉球二年一貢後爲倭寇所破改期十年今其國休養未久暫擬五年一貢俟新王冊封更議從之

崇禎二年貢使請封命遣官如故事禮官何如寵復以履險糜費請令陪臣領封帝不從乃命給事中杜三策行人揚掄往成禮而還自是迄崇禎末並修貢如儀後兩京繼沒唐王立於福建猶遣使奉貢其虔事天朝爲外蕃最云

呂宋

呂宋居東南海中在臺灣鳳山沙馬蹄洪武五年遣使入貢永樂三年帝遣官齎詔撫諭其國八年復來貢自後久不至萬厯四年官軍追海寇至其國國人助討有功復朝貢時佛郎機強與呂宋互市久之築室其地竟乘其無備襲殺其王而據其國名仍呂宋實佛郎機也

古麻剌朗

古麻剌朗東南海中小國永樂十五年遣中官張謙齎敕撫諭賜之絨錦紵絲紗羅其王幹刺義亦奔敦率妻子陪臣隨謙來朝貢方物禮之如蘇祿國賜以印誥冠帶金錢

文綺明年還中途遘疾卒賜諡康靖命其子苾刺嗣爲王
賜鈔幣率眾歸

佛郎機

佛郎機又稱干系臘國地近滿刺加正德中據滿刺加地
逐其王十三年遣使貢方物請封詔拒之

十五年佛郎機入貢紀本御史邱道隆言滿刺加乃收封之

國而佛郎機敢併之且啗我以利邀求封貢決不可許御
史何喬言佛郎機最凶狡兵械較諸蕃獨精前歲駕大舶
突入廣東會城礮聲殷地留驛者違制交通入部者桀驁
爭長今聽其往來貿易勢必爭鬪殺傷南方之禍殆無紀

極祖宗時貢有定期防有常制近因布政吳廷舉謂缺上供香物不問何年來卽取貨致番舶不絕禁防益疎佛郎機遂乘機突至乞悉驅在澳番舶及番人潛居京師者疏下禮部議從之

嘉靖二年佛郎機入寇官軍擊走之先是其別將都盧以巨礮利兵橫行海上官軍擊擒之獲二舟得其礮卽名爲佛郎機副使汪鋐進之朝用以守墩臺城堡火礮之有佛郎機自此始然將士不善用迄莫能制寇也

已而定令諸番貢不以時及勘合差失者悉行禁止由是番舶幾絕因巡撫林富言互市有四利自是佛郎機得入

香山澳爲市而其徒又越境商於福建往來不絕至二十六年巡撫朱紘死海禁復弛佛郎機遂縱橫海上無所忌而其市香山澳壕鏡者至築室建城雄踞海畔若一國然將吏不肖者反視爲外府矣

四十四年僞稱滿刺加入貢已改稱蒲都麗家守臣以聞下部議言必佛郎機假託乃卻之

萬厯中破滅呂宋盡擅閩粵海上之利勢益熾三十五年番禺舉人盧廷龍會試入都請盡逐澳中諸番出居浪白外海還我壕鏡故地當事不能用

和蘭

和蘭又名紅毛番地近佛郎機所恃惟巨舟大礮舟長三十丈廣六丈厚二尺餘樹五桅桅下置二丈巨鐵礮發之可洞裂石城震十里世所稱紅夷礮卽其製其柁後置照海鏡大徑數尺能照數百里

萬厯二十九年和蘭駕大艦攜巨礮薄香山旋引去

三十二年駕艦抵澎湖時佛郎機橫海上紅毛與爭雄復汎舟東來攻破美洛居國與佛郎機分地而守後又侵奪臺灣地築室耕田久留不去海上奸民闌出貨物爲市又出據澎湖築城設守漸爲求市計天啟三年巡撫南居益發兵討之遂揚帆去澎湖之警以息然其據臺灣者猶自

若也崇禎中爲鄭芝龍所破不敢窺內地者數年

已上外國傳

明會要卷七十七終